

■ GRISCHUN

Cunvegna da cunfinaris cun l'Italia

Da las tractativas da la regenza grischuna

(cc) La regenza grischuna beneventa las tractativas per ina cunvegna da cunfinarias e da cunfinaris cun l'Italia. Ultra da quai ha la regenza approvà in project per ina cussegliaziun al telefon da geniturs e da persunas cun la pussanza dals geniturs che sa chattan en situaziuns da conflict. Plinavant ha ella concludì ch'il chantun sa participeschia ad in'enquista da mobilitad l'onn proxim. La regenza grischuna renconuscha la necessitad d'adattar la regulaziun da cunfinarias e da cunfinaris cun l'Italia. Sco ch'ella scriva en sia risposta ad ina brev averta da la deputada grischuna *Nicoletta Noi-Togni* èn vegnidas iniziadas tractativas tranter la confederaziun e l'Italia. Sin ils resultats da quellas ston ins ussa spetgar. Il chantun Grischun è represchentà en la delegaziun svizra da tractativa tras l'administraziun da taglia. Ina soluziun betg cunvegna è ord vista da la regenza grischuna da desdir la cunvegna da cunfinarias e da cunfinaris vertenta cun l'Italia. Ina iniziativa correspundenta dal chantun Tessin na vegn betg sustegnida da la regenza grischuna. La regenza è da l'opiniun che la desditga da la regulaziun da cunfinarias e da cunfinaris vertenta possia cha-

schunar difficultads considerablas perquai ch'il resultat da las tractativas davart ina nova regulaziun è absolutamain intschert.

Clom d'urgenza per geniturs er per il chantun Grischun

Er la populaziun dal Grischun duai pudair duvrar en l'avegnir in clom d'urgenza per geniturs. La regenza ha approvà ina cunvegna da prestaziun cun l'uniun «Clom d'urgenza per geniturs» che dura trais onns ed ha deliberà per quai 91 500 francs. Sut il numer da telefon 0848 35 45 55 (tariffa da la rait fixa) maina l'uniun nà da Turitg in clom d'urgenza permanent per geniturs u per persunas da referiment d'uffants e da giuvenils da mintga vegliadetgna.

Durant 365 dis ad onn pon geniturs dumandar agid tar il clom d'urgenza en cas da situaziuns da surprensiun educativa, da conflicts, da crisas u da violenza.

Ultra da la cussegliaziun per telefon vegn er renvià en cas da basegn a posts spezialisads en la vischinanza da las persunas pertutgadas. Da questa purschida profitan gia oz plirs chantuns. Il clom d'urgenza per geniturs duai cumpletar la purschida da cussegli-

ziun per geniturs existenta dal chantun Grischun.

Enquista davart la mobilitad en preparaziun

Il chantun Grischun sa participescha l'onn 2015 puspè ad in'enquista naziunala davart il cumportament en il traffic da la populaziun. La regenza ha prendì enconuschientscha dal project cun il titel «Microcensus mobilitad e traffic 2015 dal chantun Grischun». Il project furnescha ina da las basas las pli impurtantas da datas per preparar differentas decisiuns da la politica da traffic.

Ma er per la planisaziun dal territori èn las infurmaziuns davart la mobilitad da persunas da gronda impurtanza. L'enquista davart il cumportament en il traffic vegn fatga mintga tschintg onns.

En quest connex vegn in tschert di da referenza fatga ina vasta enquista en la populaziun davart ils meds da traffic duvrads, davart las distanzas fatgas sco er davart ils temps da partenza e d'ariv. En spezial vegnan eruidas las decisiuns davart la tscherna dal med da traffic e da la ruta. La participaziun al project da l'onn 2015 vegn a custar il Grischun tut en tut 70 000 francs.